

## Dörfligeischer 1976

Der FCB isch i d' Nati A cho,  
D' Schulde däge se jetz verloh,  
Doch dä Schuss isch hinge use,  
Allne foht es jetz afo gruuse,  
Keini Lüt gö d' Mätsch go luege,  
Alles ligt deheim bim pfluuse,  
Die Fläsche sötte das begryffe,  
Wenn si wie d' Afänger agryffe !

\*\*\*\*\*

Stämpfle tüege immer meh,  
Arbeit heigi si keini meh,  
Vom Bänkli umehocke am See,  
Däg vielne jetz der Arsch scho weh,  
Bis i d' Stross use gsehse se stoh  
Vor däm Stämpfli-Bürrio,  
Doch die Tschingge grinse no,  
Ohni z' chrampfen viel Gäld z' übercho !

\*\*\*\*\*

Es wünschst sech üsi BSG  
Es nöis Schiffli ufem See,  
D' Verhandlige näh fasch keis Änd,  
Wo si dä Chaschte boue wänd,  
Doch wo's sowyt isch gsy,  
Isch dä Chaschte gly boue gsy,  
Du chasch es allerdings jetz no gseh,  
Dä Kahn bringe die nie i See !

\*\*\*\*\*

Der Furgler seit zu syne Buebe:  
Müesst jetz guet ufpassen u luege,  
I will euch schnäll demonstriere,  
Wie me öppis cha dürestiere,  
Der Gnägi chasch i Badhose gseh,  
Eso ne Buuch gsehse niemals meh,  
Hoor am Ranze wie ufem Gring die Junge,  
Wo'n är hett zum Coiffeur zwunge !

\*\*\*\*\*

Bir GM hei si Lüt entloh,  
Der Stadtrat hett derzue Stellig gno,  
Was sich die Yänkees do erloube,  
Chönne si eifach nid gloube,  
Si brüele Zeter und Mordio,  
Hei es grosses Gschrei abglo,  
Bi Entlassige i Uhrebude schwige si,  
Isch es öppe wäge Schmiergälder gsy ?

\*\*\*\*\*

Söi im Stall losch frei lo loufe,  
Affe chöi so besser roufe,  
Ou en Esel ufem Bärg  
Louft frei ume wie jede Zwärg,  
Nur bösi Beschtie sperrt me ii,  
Wüu's süsch Unheil gäb derby,  
Doch wenn hütt wosch Outo fahre,

Muesch di abinde i dim Chare !

\*\*\*\*\*

Vom Gring bis abe zu de Schueh,  
Socke ghöre ou derzue,  
Wenn das all's ächt söu sy,  
Uf all Fäll gälb-rot muess es sy,  
Schal und Stiefu sowie d'Uhre,  
Gloubet nid, es sigi Huere,  
Vo wyt här chasch se erkenne,  
Fän's-Club tüe si sich benenne !

\*\*\*\*\*

Verkehrssanierig isch grossi Mode,  
Sogar i de Bärge obe,  
Doch i üser Kuhzunftstadt  
Isch sogar e Politess platt,  
Wo si söll go Verkehrsdienst mache  
Hett's Ihre fasch d' Sproch verschlage,  
Bim Jurablick hett's viu Inseli gäh,  
Die Politesse findet kei Platz meh !

\*\*\*\*\*

Im Jura obe chasch go jage,  
Wildsou, Reh und ou Fasane,  
Gemsi, Räbhuehn, Änteli,  
Es chöi ou schöni Meitli sy,  
Doch die allerschlimmschte Beschtie,  
Darfsch ou dört nid abechlepfe,  
Denn i gar keim Tierbuech inne,  
Gsehsch Sangliers oder Béliers-Gringe !

\*\*\*\*\*

Der Klammer heig jetz Löchli-Schy  
Bim Russi tüege si Düsemotörli dry,  
Innauer's Aazug sig wie ne Ballon  
Jedoch nid vo wäge Alkohol,  
Der Morerod gäb me nöii Schueh,  
D' Maite überchäm die alte für ihri Chue,  
Das alles söue mir finanziere,  
Wüu die arme Cheibe nüt verdiene !